

人事序

昌圖爲蒙古科爾沁後旗所屬前清嘉慶七年弛游禁牧准漢人墾田數年之間草萊闢田野治游牧之區居然耕稼時期矣顧社會之發展愈盛人事之糾紛亦愈多或以時值飢荒而盜賊屢起或以人事感召而災異頻仍凡我編氓幾罹顛厄賴官紳經營挽救故迭遭變故戶口終未凋殘且爾時漢族膺集類皆貧民餬口四方也好尚不同習俗各異民風樸樸鄙野在所不免數十年來敦尚仁風提倡實業幾於道一風同雖曰日趨於文爲天演之公例苟非紳耆宿儒勤導默化之功曷克臻此因志人事

宗教

人之有高智識者罔不思別開一境以範圍一世之人心使之深信仰焉此古今宗教之所由興也自孔子出集群聖大成本庸言庸行之正以爲時中施措之宜洵至盛矣儒教漢唐以還昌言佛老崇拜漸歧近世門戶洞開任人信教不復爲心理之束縛可謂道並行而不悖矣

佛教

佛教一名釋教其教徒曰和尚削髮誦經衣衲亦被袈裟專恃布施及爲人誦經禳解等事以度日所居寺院多有遺產大約爲諸檀越所捨施及近世變法議會成立其產多議歸辦公益故現在還俗者往往有之

道教

本境道教向分二種其一蓄髮吃齋誦經不娶妻室者曰道士所居必在宮觀其一不蓄髮不吃齋娶妻生子無異常人者曰伙居道惟遇人家辦喪事時則道冠道服

高坐誦經或吹管捧簫奏數以賺錢而已

喇嘛教

本佛教處之一支派獨蒙族人常奉之削髮念經與和尚等惟著紅黃衣裙是其特色其族居處得曰喇嘛廟有宗噶巴者由紅教改黃教之首倡人也生於明永樂時之西寧衛得道於西藏之甘丹寺示寂於明成化十四年初修紅教因紅教專持密咒借吞刀吐火以惑俗與巫無異遂力矯其弊並將衣冠易紅爲黃以示區別由是而黃教以興又遺囑其二大弟子一呼畢爾罕一呼畢勒罕世世遵之蓋即化身之謂也且紅教與黃教異者紅教娶妻傳子黃教則不娶妻也昌圖爲蒙王游牧地本城既有僧王祠堂旗留界各村亦有喇嘛廟現在城鄉各廟喇嘛皆爲宗噶巴教之黃衣派紅教則寂無人焉

回回教

原名天方教獨回族崇奉之教規甚嚴整不吸菸不飲酒不食豬肉其族一概遵守

因敢踰越他處有寺者曰清真寺昌圖則無之雖有其人來作小本經營而無置賣房地之權以當初蒙王有禁令不許其入斯土之境也今則禁解矣

天主教

法國天主教堂邑內者在本城南街外鎮者一在通江口街一在金家屯街一在八面城街一在寶力鎮街惟通江口街之教堂焚燬後未立共四處

耶蘇教

英國耶蘇教堂邑內者在本城東街外鎮者一在八面城街一在通江口街一在金家屯街一在大窪街一在寶力鎮街一在鶯鶯樹街惟通江口之教堂亦燬於火共六處

世界大同佛教會昌圖分會

該會於大同三年一月間呈奉核准在縣城南街玉皇閣舊址成立公舉正會長一人副會長二人內分文牘會計監察總務四股各設股長一人幹事四人會員無定

額常年經費由會員臨時酌籌以勸人行善去惡日滿親善爲宗旨

佛教攷

佛教亦多神教之一始祖爲釋迦牟尼亦稱釋迦文神幼名志達又曰瞿曇曰喬達摩蓋古今譯音不同耳生於周靈王十五年甲辰先孔子一歲即西曆紀元前五百五十七年也父淨飯王爲北印度迦毘羅城主母摩耶夫人志達年十六娶耶輸多羅舉一子及十九入雪山修行六年旣出山在迦耶山之菩提樹下大有所悟遂四出說法凡四十餘年壽八十示寂於跋陀河之遮羅雙樹間在周敬王時弟子甚衆後其教徒以大迦葉阿難陀舍利弗須菩提富樓那同雲連迦旃延阿那律婆離羅暇羅爲佛門十哲蓋釋迦之義爲能仁牟尼之義爲寂點佛以悲智濟度衆生故得此嘉號云後漢明帝時始入支那至晉宋間而大盛梁武帝時菩提達摩由印度浮海至廣州帝問供奉佈施有何功德答謂此乃人天小果有漏之因並無福惠遂不契遊北魏入嵩山少林寺面壁十年開禪門之派奉之者尊爲震旦第一初祖五傳至弘忍示寂後弟子爭傳衣鉢久之分爲潞仰曹洞臨濟雲門法眼五宗今者惟臨

濟爲最盛云其教有要義三一曰自覺謂自悟本性二曰覺他謂說法度人也三曰覺行圓滿總謂之佛陀所傳之經初爲漢明帝時摩騰竺法蘭以白馬駝至洛陽舍於鴻臚寺後僧廟以寺爲名即始於此焉迨晉義熙中釋法顯自長安游天竺經三十餘國歸後與群僧互叅辨定成佛國記一卷又後秦時鳩摩羅什自龜茲入長安姚興尊信之令與諸長老譯經三百卷是爲三論宗之開祖降自唐初有玄奘法師者姓陳氏偃師人隻身而游五印度入戒賢律師之門精窮內典十餘年歸國齋還經論六百五十七部譯爲千三百三十八卷太宗高宗均奉崇之是爲佛教再盛時代及五季兩宋則不甚起色蓋前見駁於儒之性理後見掩於道之青虛遼金元則均以番僧主之同源異流並行不悖宗風賴以不墜迄明太祖因出家皇覺寺故諸王均輔以僧後世繼承弗替清則雖守喇嘛教而沙門亦頗崇尚設有僧綱僧錄僧會等官歸禮部專轄末葉維新雖漸抑削未幾即改民國於是宗教自由無所謂興衰伸縮矣滿洲建國於此教爲舊相識頗溫前好而東鄰亦樂之不疲蓋有水乳交

融之勢焉

道教攷

道教爲支那固有最古之教濫觴於黃帝相傳帝曾向崆峒山問至道之要於廣成子故釋史引論語撓輔象謂黃帝有七輔風后受金法天老受天籙五聖受道級知命受糾俗窺紀受變復地典受州絡力收受準斥州選舉翼佐帝德迨至周而老子出始大宏其教後世奉之者故並稱黃老云按老子名耳字伯陽謚曰聃亦稱老聃周守藏室之史也孔子適周曾問禮焉所著書即名老子又名道德經分上下二篇綜五千餘言今所傳者爲漢河上公魏王弼二家所注漢文景兩帝頗尙之迨東漢張良八世孫道陵始立宗教晉時稱天師道六朝時爲天師所掩隋書經籍志始詳載之至唐則以老子爲所自出尊爲玄元皇帝據唐書選舉志明皇注道德經成命貢舉人減尙書論語策而加試老子是爲道教極盛時代北宋徽宗時崇奉尤甚至以道君爲號元至正十三年命張道陵三十六世孫張宗演爲輔漢天師居江西龍

虎山立道教碑以闡揚之明洪武元年革其舊號改封爲正一嗣教護國開祖通誠崇道宏德大真人秩二品清沿明制朝會班列在侍郎上乾隆十二年御史梅穀成奏請革其封襲部議降秩正五品然所傳於世之符籙宗之者稱正一派准娶妻修行即今所稱依居道士是也至棄絕塵緣而純然出家以清靜無爲爲教旨者爲道行最高其派甚多亦分南北究以龍門爲最盛若華山金山尹喜等派則瞠乎其後矣此外有所謂燒黃鍊白安鑑調鼎又屬教中之較淺者耳歷攷道教古今所著之書爲世所尙者一曰雲笈七籤宋張君房撰蓋校正秘閣道書撮其精要而成以天寶君說洞真爲上乘靈寶君說洞元爲中乘神寶君說洞神爲下乘太元太平太清三部爲輔經又別正一法爲一部總爲七部凡百二十卷也一日叅同契神仙傳稱魏伯陽著其說似周易實借爻象以論作丹之法又借納甲言坎離水火龍虎鉛汞之要因綜易周黃老爐火三家歸一故名之爲叅同契宋儒朱子爲作考異蔡元定亦曾治之可想其功用又勝他經一籌也一日悟真篇宋張伯端撰演說金丹要旨

與泰同契互相發明元戴啓宗明翁葆元皆有注疏今學道者亦頗重之餘則或駁不而純或偏而不全均等諸自檢以下而已

喇嘛教攷

喇嘛亦佛教之一派唐時自印度入西藏至今以西藏爲此教之中樞並行於滿洲蒙古有新舊二派舊教衣紅故稱紅教末流漸入妖妄新教衣黃故曰黃教清時認正教而保護之此大別也按黃教之祖帕克巴爲西番高僧傳至明永樂十五年宗喀巴始生於西寧爲蒙族人幼名阿奴八歲出家二十四歲赴西藏三十四歲後闡明黃教大顯宗風至今教中尊爲始祖而紅教於是乎微矣其開宗有二大弟子曰達賴喇嘛曰班禪額爾德尼達賴世駐前藏班禪世駐後藏謂能化身轉世輪廻不已其他若諸呼圖克圖（俗稱活佛）亦能之如庫倫之哲布尊丹巴其尤著者也身死之後不昧本性寄胎轉生復接其前身之職位謂之呼畢勒罕今蒙古各旗亦數見不鮮矣所奉之經純係西藏文字橫行右上與泰西文體畧同初盛於元繼盛於

清元時世祖曾封以國師之號權位極尊參預政事國有大故每取決之其徒至有侮辱官吏莫敢誰何者脫脫丞相至以府第施捨今北平六隆善寺即其遺址也清至雍正入承大統以潛邸爲龍興之始改爲佛寺廣度僧侶使之祈福保安因以雍和宮命名焉掌教之喇嘛秩一二品以次稍殺至德英齊止各有職俸此外則有黃寺黑寺之設亦畧同雍和每值上元及四月望日皆跳闌打鬼蓋祓除不祥意也然非首善之區輦轂之下不得有興盛二京（今瀋陽縣興京縣）爲豐鎬舊都亦各建設儀制相同若熱河乃避暑山莊每歲木蘭秋獮內外蒙古大會青海西藏各酋亦每就之朝覲故建布得拉伊犁等廟規模宏大住持喇嘛以萬計爲京外之冠其戒律不禁葷酒還俗亦間聽之凡有那穆罕綽爾濟名號者以其爲佛地中人雖王公皆拜跪如儀蓋從天爵不從人爵也至其教旨與沙門同源不過禮儀不同語文各異耳實在一而二二而一者也

回回教攷

回教本名伊斯蘭教亦獨神教之一創始於穆罕默德按穆爲阿拉伯之默伽人生於西曆紀元五百七十年歿於六百三十二年初爲行賈自二十五歲傭於富孀家後遂娶以爲妻暇輒獨居沉思旋自稱受神之使命出而說教爲君所迫西曆六百二十二年避居默德那皈依者漸衆乃率之攻取默伽握其政權以次征服阿拉伯全土及叙里亞歿後嗣其任者以爲該教宗主號曰哈利發故至今除各處掌教者曰阿訇外其常駐禮拜寺之宰牛羊鷄鴨者仍沿稱哈利發云其教之聖典名可蘭經有要義三一心中祇有唯一之眞神二穆罕默德爲神之預言者三世人命皆有定教徒謂此經乃穆直接受之眞神阿賴者亦猶猶太基督兩教謂舊約乃摩西直接受之眞神耶和華也初盛行於中亞細亞者非洲及土耳其南洋群島中古時西班牙亦頗奉行十八世紀始熄據明邱瓊山謂陳隋時始入支那宋元時據有中亞細亞遠史云耶律大石率衆西行歷畏吾兒及回之大食部又云大石駐軍辱里干凡九十日回回王降貢方物及元太祖始滅之然元史混回鵠爲一誠屬誤會蓋回

鵠即回紇改稱實即畏吾兒回回則唐書稱爲貨勒自彌乃花刺子模一音之轉身
明時夷爲部落間與支那入貢互市迨前清乾隆後以香妃故准其在各省雜居立
寺與民籍一體居官考試惟吾昌圖乃科爾沁博多勒噶台親王地初招墾即禁止
回民花臉入境承佃屠牛載在契券光緒末始漸僑寓入民國則五族共和此禁遂
完全弛矣至回民言語文字已早同化惟歲時節序終異另有所謂小歷祭祀紀念
宜忌等期附之蓋不敢顯違正朔也七日赴清真寺禮拜浴身唸經童子髻鬚必赴
寺行割禮將其勢下端細筋割斷名曰斫損據云亦衛生意也除夕掌教者爲各戶
代書回文吉語張之門楔謂之粘篤哇兒云能避邪魔蓋即桃符之類人死必淨身
纏布唸經同用一棺舁至葬處將屍由棺底著墳內掩埋寺內執事人唸經慰靈畢
復向喪主執紼者祝福而散婚則不交拜天地僅唸經而已其寺中不供偶像門東
向祈禱俱面西跪禮節亦頗簡單詢之阿訇僉稱穆罕默德爲之欽差因中古時彼
土民衆頑梗故穆適用強迫信教嚴格之義殺惡即所以救善亦主張天堂地獄與

耶蘇教異同故曰亦獨神教中之一不過不向外族傳教較爲範圍狹小而已

天主耶蘇兩教攷

天主舊教也耶穌新教也西人名爲加特利原本一教不過所守規誡不同耳按耶穌基督猶太人生於漢哀帝建平三年丁巳而西歷則由越四年平帝元始元年爲紀元積久相沿不能矯正也其教以博愛爲主義近於支那之墨子謂靈魂不死有天堂地獄之別已乃上帝獨生子捨身救民被釘復活升天以待世界末日分別善惡一一審判其歷史源流在耶穌之前天主教俱見於聖經上卷耶穌之後耶穌教俱見於下卷實則耶穌之前爲舊約耶穌之後爲新約事實畧同文詞互異也新舊之分蓋自馬丁路德始路德生於日耳曼之薩克森曾爲神學教授適羅馬教皇遣使傳免罪券頗反對之著論風靡全歐教皇怒削其籍路德亦焚其令狀旋爲羅帝查理第五所抑卒不屈退譯德文聖書公諸同道提倡信教平等自由思想脫離教主專制階級英美諸國多奉之事在十六世紀之前故今天主教內容悉仍舊制傳

教者曰司鐸通稱曰神甫教民尊之若神入教最要者須遵守領洗婚配告終終復等禮紀念期每歲有四大瞻禮不得與外教聯姻不得自由出教其教士男不娶女不嫁早晚有課必向十字架前唸經至七日禮拜則與耶教無異也耶穌教則不然所守者十誡不供設偶像望空祈禱與傳教之牧師君僕相呼分庭抗禮信否自由牧師可以娶妻謂耶穌曾有與其慾火攻心不如嫁娶爲妙之語其婚喪雖亦延男女同道唸經唱詩蓋爲祝福而然初非教中成文法規實宗教之一大革命此所以有新舊之別也至俄國之希臘教爲耶穌私淑弟子保羅所傳規制介乎兩教之間聖經用俄文譯之亦頗彷彿正如佛教中喇嘛與僧伽同源而異流耳